

清乾隆三十五年直隶光州知州高兆煌总修

16

光州志



信阳地区地方史志总编辑室
潢川县地方志编纂办公室 点校重印

清乾隆三十五年直隶光州知州高兆煌总修

光

州

志

江苏工业学院图书馆

藏书章

点校说明

清乾隆三十五年(公元1770年)刊印的《光州志》,正卷68卷,附余12卷,系直隶光州知州高兆煌总修。高兆煌,字果亭,河北大兴人,甲戌进士,乾隆三十二年署任光州。其总修的《光州志》,历述各代沿革变化,博征载籍,“其盐税、牙帖等篇,尤为详尽,非他志所可比拟”(《续修四库提要稿》)。其内容包括当时光州直隶州辖境,即今潢川、光山、新县、商城、固始、息县、淮滨等七县的地志资料,约八十万字。

此次点校以北京图书馆、湖北省图书馆和潢川县档案馆馆藏的三个底本为据,按规范简化字进行标点、校勘。

一、改原本竖排为横排,以便阅读使用。

二、整理该志的指导思想,是为社会主义两个文明建设提供历史资料,因此对原本只作校勘,不加注释,以免妄生歧义。

三、凡古体、异体、繁体字,包括地名、人名,在简化汉字范围内均予以简化(以《辞海》修订本为准);易生歧义的地名、人名保留原字;某些繁体字的特殊用法不作简化,加乾坤的“乾”,有时也可简化为“干”。

四、校勘主要依据一些必要的工具书、《十三经注疏》、二十四史、《清史稿》、《通鉴》、《续通鉴》,以及其他有关书籍,如《元和郡县图志》、《水经注》等等。并参照中华书局整理二十四史的方法进行校勘。

(1)从正史中能查出根据,确为脱讹衍倒者,一律予以改正;正史未载,则依据相应的书籍,如有错误,酌加改正;确系错误,而又无据可查者,不予改动,只作校勘说明。

(2)《通鉴》、《续通鉴》与二十四史相矛盾者,以二十四史为准;若二十四史未载,则以《通鉴》、《续通鉴》为准。

(3)编修者避当朝讳或家讳者,一般不作改动,有碍文义、违背史实者(如“郑玄”,清时避讳多写成“郑元”),酌加改动并于首改处出校,余皆径改,不一一出校。

(4)校改之处使用的符号,圆弧()中的字词为误者,表示删去;方弧〔 〕中的字词为改正之字,表示增补;()或〔 〕单独使用时,表示删去衍字或增补漏字;次序颠倒者,用方弧、圆弧加以删、添,使其恢复原状,或直接于校记中详加说明。

(5)校勘只限于底本文字的脱讹衍倒,编修者见解上的谬错,不在校勘之列。

五、标点的使用,按现行规范进行。

(1)书名全称者加书引号《 》,非全称者,原则上不加《 》,

但某些习惯和特殊的写法，则加《》，如《诗》、《书》、《史》、《通鉴》等；人名、官名指书者，加《》，如《孟子》、《大司徒》等。

(2) 能确认其为引文，且起讫分明，未夹杂引用者词气转换等主观色彩的加引号“”，引而兼述，界限不清的，酌加引号；引文为原句而略有删节者，酌加引号；特殊的字、词，酌加引号。

(3) 一般不使用破折号(—)、省略号(……)。

六、根据文字内容，语气，在不损害原意的前提下，适当分段；原本正文中排双行的小字，点校本中排为6号老宋字，一般正文用5号老宋字；原本中脱落，辨认不清的字，加□。

七、为保持全书原貌，原图均予以保留，适当缩印。

《光州志》的点校工作，是根据中共信阳地委(1984)4号文件要求，在信阳地区史志编委和潢川县志编委的关怀和地区史志编委副主任李风的具体指导下，由信阳地区史志总编辑室、潢川县地方志编纂办公室合作进行的。首先聘请潢川县马风先生初点全本，之后由地区史志总编室的胡捷民、陈连辉、王川里和潢川县志办的高树先等同志进行复校，再后由陈连辉对全书进行校勘，并写出校勘记。原图由潢川县志办的杨智义联系绘成。最后，由陈连辉、李德发决校付印。此外，参与这项工作的还有，原地方志总编室主任任恩发、副主任郭克己和滕凌飞、谭国友、胡元州，以及潢川县志办副主任胡模海等同志。

由于这部志书容量大，涉及面广，而点校者的业务水平，参考书籍有限，点校本中难免有许多错误和不当之处，恳请专家学者批评指正，绳愆纠谬。

一九八五年十月

叙

自班固裁定龙门义例，成《汉书》，后之作史者宗之，而志乘即于是乎昉焉。志乘之设，所以备一方文献，俾为治者按古今得失，知因革损益之所宜，而在上者亦得以采览，汇集成一代掌故。其事巨不可以散佚，其责重不可以浅陋猥琐者从事，故称善志者难焉。

光为州，南界荆楚，东连吴会，虽豫属，而民风土俗与吴、楚不少异，盖地气使然也。余以乙酉岁典试豫省，丁亥复奉简命，督学兹土。观其人文，光殆甲于中州。盖国家重熙累洽，越百数十年于兹。嵩、洛灵淑之气，钟聚于奥区，而其乡之贤士大夫树之风声。复得莅兹土者，优柔饫饩而作兴之，其骎骎日上，殆未有艾，即人文而他可知矣。

州旧有志，不戒于火。州牧果亭高君，惧其州之文献无征也，慨然修举，四属襄其事，即旧志之仅存者，芟其繁谬，补其缺略，自建置、星野、疆域以迄人物、杂志，为图经一，为志三十九，为列传九，为卷共六十八，而以艺文附余十二卷终焉。凡夫民生所利赖，为治之要务，旁搜博考，发凡起例，一本史家彰瘴激扬之旨，而不徒以摘华炫采为能事。吁！高君之用心，可谓深且远矣。

客春，余试是州毕，高君以志叙请，未即就。今夏再至，而高君以挂误去官，署牧青泉朱君，复申高君之志。余既重其请，且幸兹州文献修明，足以备在上者之采览，而后起者亦得承前志于勿衰也，于是乎书。

日讲官起居注、詹事府少詹事、提督河南学政加一级柏山嵩贵叙。

光州郡志序

乾隆三十五年七月，光州守高君渠亭遣使，携其所修州志缮本，而以书囑予为序。高君与予同里，客游十数年来最相知，博雅精于史例，志既成，其足以信今而俟后也无疑。我国家重熙累洽，百有余年，制度考文，垂宪万世，所纂《大清一统志》，于乾隆六年告成，颁行天下。煌煌巨典，照耀今古。我皇上御极以来，仁渐义摩，声教四迄，幅员之广，为自古所未有。凡令典之昭示与夫人才风俗之美，日新月盛，固不可胜纪也。前岁复命续修《一统志》，自雍正八年，起因征各省通志，而通志必以郡县志为凭，则郡县志之宜修，亦守土者分内事也。然往往视为不急之务，有数十年不修，旧板既多残缺，考其近事，惟散见于吏牍中，汗漫不可收拾。此余往官翰林时，曾与修一统志，日事校讎，熟悉而深知之者。

今高君以旧板毁于火，莅任后遂起而修之，及披阅其书，为类凡五十，并其总序，共六十有八卷。盖去旧志之讹谬冗泛者，而复博征于载籍，俾阅者瞭然识其原委，而皆得其义例之所存，其用心可谓勤而当矣！州故剧邑，属县四。案牍之烦，甲于通省，刺史以一人综理簿书钱谷之事，日不暇给，行唐刘君怡园实佐成之。刘君亦余同里友，学无所弗该，而操觚一出乎正，其收辑考据，最为精详。于时蒞菴土者，光山令固庵吴君，固始令梅峰陆君，息县令魏甲孙君，皆分肩其任，故不逾年而竣事，其关心制作，以彰朝廷之盛典，而宣治化于不遗也，俱可见矣。遂书此以付其使，他日归京师，与高、刘二君谈及之，当亦为之快然也夫！

赐进士出身、诰授通奉大夫、詹事府詹事、兼翰林院侍讲学士、致仕加一级昌平陈浩序。

光州志目录

卷 之 一	图经.....	(1)
卷 之 二	建置志.....	(3)
卷 之 三	星野志.....	(7)
卷 之 四	疆域志.....	(13)
卷 之 五	山志.....	(15)
卷 之 六	水志.....	(19)
卷 之 七	形胜志.....	(23)
卷 之 八	城池志.....	(25)
卷 之 九	街巷志.....	(28)
卷 之 十	乡里志.....	(30)
卷 之 十一	坛庙志.....	(36)
卷 之 十二	学宫志.....	(47)
卷 之 十三	书院志.....	(57)
卷 之 十四	秩官志.....	(63)
卷 之 十五	师儒志.....	(83)
卷 之 十六	公署志.....	(92)
卷 之 十七	户口志.....	(97)
卷 之 十八	田赋志上	(101)
卷 之 十九	田赋志下	(113)
卷 之 二十	土贡志	(125)
卷 之 二十一	盐法志	(127)
卷 之 二十二	牙税志	(132)
卷 之 二十三	仓储志	(135)
卷 之 二十四	沟洫志	(141)
卷 之 二十五	津梁志	(152)
卷 之 二十六	关隘志	(155)
卷 之 二十七	食货志上	(157)
卷 之 二十八	食货志下	(168)
卷 之 二十九	市集志	(172)
卷 之 三十	风俗志	(175)
卷 之 三十一	恤政志	(179)
卷 之 三十二	监狱志	(186)

卷之三十三	邮传志	(189)
卷之三十四	坊表志	(193)
卷之三十五	丘墓志	(196)
卷之三十六	古迹志	(199)
卷之三十七	典礼志上	(202)
卷之三十八	典礼志下	(213)
卷之三十九	选举志上	(218)
卷之四十	选举志中	(226)
卷之四十一	选举志下	(242)
卷之四十二	兵制志	(249)
卷之四十三	封爵志	(257)
卷之四十四	艺文志	(263)
卷之四十五	纪事志	(265)
卷之四十六	宦迹列传一	(283)
卷之四十七	宦迹列传二	(298)
卷之四十八	宦迹列传三	(316)
卷之四十九	宦迹列传四	(330)
卷之五十	仕贤列传一	(339)
卷之五十一	仕贤列传二	(349)
卷之五十二	仕贤列传三	(361)
卷之五十三	仕贤列传四	(373)
卷之五十四	仕贤列传五	(381)
卷之五十五	武功列传	(389)
卷之五十六	忠义列传	(393)
卷之五十七	善行列传一	(400)
卷之五十八	善行列传二	(408)
卷之五十九	善行列传三	(417)
卷之六十	文学列传	(428)
卷之六十一	寓贤列传	(437)
卷之六十二	列女传一	(440)
卷之六十三	列女传二	(452)
卷之六十四	列女传三	(460)
卷之六十五	列女传四	(474)
卷之六十六	方技列传	(484)
卷之六十七	杂记	(489)
卷之六十八	总序	(492)
附 余 卷		(496)
名胜图说序	附图	(614)

光州志卷一

图经

图书肇自伏羲，迨至黄帝，河龙图发，洛龟书（威）〔感〕①，出《尚书中候》。得其五要，以开百制。乃命沮诵作云书，孔甲为史，纂纪图籍，以传后世。嗣夏禹平水土，远方图物贡金，九牧乃范形于鼎，峙而为九。别有皇图，藏之策府，以贻孙子。后夏乱，关龙逢执皇图以谏，桀诛龙逢，焚皇图。太史终古执所掌之图，归于有商。由商及周，则有职方氏掌天下之图，以掌天下之地，辨其邦国、都、鄙、四夷、八蛮、七闽、九貉、五戎、六狄之人民，与其财用九谷、六畜之数要，周知其利害。而大司徒又掌建邦之土地之图，与其人民之数，以佐王安抚邦国，其属又有土训掌道地图，以（道）〔诏〕②地事。

秦末，萧何入关，先收图书，具知隘塞强弱，遂以相高祖，成帝业；光武在河北尝登广阿城，指《輿地图》以示邓禹。可知图书藏于王府，为天子之秘典矣。

东汉时，置司空郡国輿地图及天下輿地图。自是以后，有《三辅黄图》、《周地图记》、《冀州图经》、《齐州图经》、《幽州图经》；而隋裴矩撰《隋区宇图志》一百二十九卷，郎蔚之又撰《隋诸州图经集》一百卷；唐长安四年有《十道图》十三卷，开元三年有《十道图》十卷、《剑南地图》二卷，李吉甫又撰《元和郡县图志》五十四卷，马敬实撰《诸道行程血脉图》一卷。宋元以来，图书累累，其名不可悉举。《宋史》《列传》载：李度每至州府，即借观图经，良以有图，则一方之山川、道里、形胜、隘塞，如聚米画沙，一览而可周知。其故欲有所施为，其经理擘画之方，即可缘之以生也。唐吕温序李该《地志图》，《序》云：“见苍梧涂山，则思舜、禹恤民之艰；睹穷荒大漠，则悟秦汉劳师之弊；览齐墟、晋壤，则想（威）〔桓〕③文勤王之霸；观洞庭荆门，则知苗蜀恃险之败。”王者于是明得失，诸侯于是鉴兴替，是故图之与志重矣哉！又左图右史，学士不可偏废。王僧虔撰《图书会粹》以后，五代有聂崇义《三礼图集注》二十卷，宋余希文有《井田王制图》一卷，吕大临有《考古图》十卷，又杨复有《仪礼图解》，龚原有《周礼图》，陈祥道有《礼书图》④。聂氏礼图虽朱子斥其不合古制，而宋初尝刊石于太学；杨复及陈祥道三礼诸图，近世治礼者皆宗之。所以传先圣之典章，示后人之法守，贞志式俗，胥在于是，非如宣和以来，博古图第，逞瞻该以矜陆离也。

光州向隶汝宁，虽有领县之名，其实州自为州，县自为县，不相统属。地不过百里内外，而为之长者，各事其事。其典籍簿书，亦各自贮掌，不相勾稽质会。其旧志之图，只自志其山川形势、城邑建置。迨于雍正二年升直隶州以来，领县有四。星分亢宿，地滨淮涯，山川回互，雄据东南，幅员几千余里。城邑村保，为口分世业之乡；官廨学宫，为敷政作人之地。他如祭祀所以报本，乡饮所以兴孝，是皆关乎政纪，其可不举全郡之形势典制，绘诸简端，以示要领乎。

州治之有图久矣。宋《艺志》载：徐自明《浮光图志》三卷；又李棣《浮光图志》二十

卷，迄今世远年湮，书已失传。今绘州及四属山川疆域总图一，分图五，星野图一，城池巷图五⑤，公廨图六，学宫图五，固始水利图五⑥，礼制、乐制图七十有三。庶使后之君子展卷披对，皎若列眉，其经画措置之宜，与张弛损益之用，亦可凭藉而兴矣。

右疆域总图一，分图五。内为方格，格为十里，欲知某所至某所远近，按格求之，即知里数多寡。其星野则依续志原图，先将度数列于星次之端，次将州县析列于所入之度之下，庶观者一目了然。又《明史·天文志》谓：亢宿中折威七星，今已无有。是图仍照《星经》原图绘入，昭其旧也。祭祀陈设诸图，依《坛庙祀典》。礼器、乐器及佾舞诸图，依《国学礼乐录》。乡饮酒礼图，依《会典》。其名物度数，皆经当代考定，足垂模范于无穷云。

校勘记

①《十三经注疏·周易正义·系辞上》疏云：河以通乾出天苞，洛以流坤吐地符。

河龙图发，洛龟书感。据改。

②据《周礼》改。

③据《文苑英华》卷738吕温《地志图序》改。

④查《宋史·艺文志》及《四库全书总目》，陈祥道著有《礼书》、《注解仪礼》、《礼例详解》，而无《礼书图》。

又《宋史》“祥”作“详”。

⑤“城池街巷图五”，本志原版缺。

⑦“固始水利图五”，本志实有六图。

光州志卷二

建置志

古今言州国者肇自黄帝，越有虞氏分十二州，之后周司徒献地图，司空营国邑，辨方正位，以立民极。后世因之，偶或有渝。我朝创制立法，师古为范，版章土宇，超轶育王。今皇上盛德广运，奄有四海，西陲扩地二万余里，凡迹域遐方，以至悬度戈壁，经画区处，至善至备。矧其在中州之地，伊迓王圻者与？

光郡介于淮、汝之间，雄据东南，统领四邑，幅员恢廓，为荆河上腴。然自春秋以来，历代建置，沿革不一，称名之繁，至未可以易数。而其田赋之等，水泽之利，山阻之险，以古证今，则皆确有依据，凿凿可考。爰摭往古之迹与当今之制，叙建置沿革，以示来兹也。

黄帝之子二十五人，为姓一十有二，其结姓《路史》云：结，本姓，今多从女字。分国，观之于古籍者，一曰光。《国名纪》云：《春秋图》有光国。今光州是也。《禹贡》为扬州之域。三代因之。《地理今释》云：扬州今江南之江宁、扬州、庐州、安庆、池州、太平、宁国、徽州、镇江、常州、苏州、松江十二府，滁、和、广德三州；凤阳府凤阳、临淮、定远、霍丘、盱眙、天长六县，寿州；淮安府山阳、盐城二县；河南之汝宁府光山、固始二县。光州；湖广之黄州府罗田、蕲水、广济、黄梅四县，蕲州；广东之潮州府及浙江、江西、福建皆是也。春秋为黄国，《国名纪》云：黄，子爵，光之定城西十二里有故城。《十三州志》云：定城置在黄子国南十二里。黄不事楚，曰：“自郢及我九百里，焉能害我？”鲁僖公十二年，楚灭之。战国属楚。秦并诸侯，分天下为三十六郡，属九江郡。《通考》云：今广陵、淮阴、钟离、寿春、永阳、历阳、庐江、同安、蕲春、弋阳、鄱阳、鄡郡、临川、庐陵、南康、宜春等郡是。汉高破楚，置郡国二十有三，分梁、沛二郡地置汝南郡，领县三十七。《汉书·地理志》所载：新息、期思、弋阳、寝、新蔡与江夏郡之西阳、軹、庐江郡之雩娄，皆今光州全郡地。东汉分天下为十三部，统郡、国一百有（八）〔五〕①，于新息境内，益褒信侯国。曹魏初置十二郡，至文帝增七，分汝南地置弋阳郡。晋武帝既平吴，置郡一百七十有（二）〔三〕②，分汝南、弋阳地为汝阴郡。弋阳统县七：其曰西阳、《晋书》云：古弦子国，曰軹、曰期思、曰弋阳，皆今光郡地，而汝阴统县八，则今光之固始、褒信属焉。刘宋置弋阳太守，统令五，曰期思、曰弋阳、曰安丰、《宋书》云：“安丰太守，魏文帝分庐江立，江左侨立，晋安帝省（令）为〔县〕③，属弋阳，宋末复立。”曰乐安、曰茹由；又置汝南太守，统相一、令十，而分新息为二，曰北新息、曰南新息属焉；置新（息）〔蔡〕太守④，统令五，而分褒信为东褒信，西褒信属焉。大明中，又分弋阳置光城左郡，统令三：曰乐安、曰茹由、乐安，今光山县，《隋书》云：县有釜山、锡山、浮光山、弋阳山，今皆在光山境。茹由，《宋书》云：“新立。”《光山旧志》云：茹由城在光山城南六十里，曰光城。名号骤易，境土屡分，地理参差，其详难以悉举。

南齐，豫州有北新蔡郡，固始、苞信隶焉；弋阳郡，期思、南新息、弋阳隶焉；光城左郡，乐安、光城、茹由隶焉；汝阴郡，宋《宋书》云：“宋令，前汉名新蔡。章帝建初四年，徙宋公国于此，改曰宋。”与阳安《国名纪》云：新息之西有阳安古城，隶焉。然自晋元帝渡江以后，豫州侨治寿春，又治芜湖。宋初虽尽得河南地，无几又失。至大明末并复治姑（熟）〔孰〕⑤，又治历

阳、宣城。所立郡县，绝无将吏，空受名领。梁初置乐安郡及安丰、光城二县，继又置光州，治光城县；天监中有州二十三，郡三百五十，县千二十有二；大同末，中州一百七郡县亦来内属。既而侯景构祸，坟籍散佚，郡县户口，不能详究。迨于陈氏，土宇弥弊，威力所加，止在荆扬之域而已。元魏据有江淮以北，创改州郡，尤无纪理。于汝南一带旧地分为弋阳郡，领县一，曰弋阳；汝南郡，领县五，南新息、北新息属之；东新蔡郡，领县四，固始、苞信属之；新蔡郡，领县二，苞信又属之；长陵郡，领县三，其一安宁，为期思之分邑，而苞信一邑，又移以属之。北齐文宣谓：“百室之邑，便立州名；三户之名，空张郡目。譬诸木犬，犹彼泥龙，循名督实，事归乌有。”良不诬也。时省并州郡，改置弋阳为南郢州。宇文周又为淮南郡。

隋混并南北，置郡一百九十，县一千二百五十有五。其隶扬州曰弋阳郡，统县六：光山、定城、殷城、固始、期思、乐安；而新息、褒信，则统于豫州之汝南郡。唐承隋业，以隋季分置州县犹多，因并分为十道，开元中续分为十五道。淮南道之光州，领县五，曰定城、固始、光山、仙居、殷城。其新息、褒信，则领于河南道之蔡州。先是，（贞观）〔武德〕⑥初，以定城为弦州，置总管府，未几罢之。太极元年，徙光州治定城。天宝初改为弋阳郡，后复为光州。迨于五代以及宋初，仍沿唐制。至至道三年，宇内既一，分天下为十五路，天圣中续增三路，元丰中又析为二十〔三〕⑦。以光州弋阳郡隶淮南〔西〕⑧路，领县四：曰定城、固始、光山、仙居。其新息、褒信，则隶于京西路之蔡州汝南郡。绍兴二十八年，避金太子光瑛讳，改光州为蒋州。《后汉书·郡国志》云：“期思有蒋乡，故蒋国。”三十一年，中丞汪〔彻〕〔澈〕⑨言：光州避金讳易名，乞复其旧，从之。嘉熙元年兵乱，徙治金刚台。咸淳四年，台毁于寇。

元至元十二年，复筑故城镇守，光州属蕲黄宣慰司，直隶行省。三十年改属汝宁府，领县三：曰定城、光山、固始。《元史》云：路、府、州、县四等。大率以路领州、领县，而腹里或有以路领府、府领州，州领县者，其府与州又有不隶路而直隶省者。至元二十八年，以颍河以南、大江以北，其地冲要，又新入版图，置省〔汴梁〕〔南京〕⑩以控制之。三十年，河南江北行省平章伯颜言：“蔡州去汴梁地远，凡事稽迟，宜升散府。”遂升汝宁府，直隶行省，以息、〔颍〕〔颖〕⑪、信阳、光四州隶焉。明洪武初，以州治定城县省入。四年二月，改属中都临濠府，领县二：曰光山、固始。七年，息县自颍州来属。十三年，领三县，隶于汝宁。成化十一年，固始知县马监奏分西南旧墟，复建商城，领于光州。《明史·职官志》云：凡州二，有属州，有直隶州。属州视县，直隶州视〔州〕〔府〕⑫。

我朝定鼎以来，建置多沿明制，故光州旧属汝宁，于光、固、息、商四县，虽存分领之名，犹无统领之责。雍正二年，抚军石公文焯以“开封辖四州三十县，地方辽阔，政务綦繁，河南府辖一州十三县，汝宁府辖州十二县，道里遥隔，稽查难周，请照晋省分隶之制，除开封附郭之祥符及陈留、仪封等十四县仍隶开封外，以西华、商水、项城、沈丘分隶陈州；临颍、襄城、鄢陵、长葛分隶许州；密县、新郑分隶禹州；荥泽、荥阳、汜水分隶郑州；河南府附郭之洛阳及偃师、卢氏等十一县仍隶河南外，灵宝、阌乡分隶陕州；汝宁府附郭之汝阳及上蔡、确山、信阳等九州县仍属汝宁外，光山、固始、息县、商城分隶光州，均改为直隶州，督催盘查各县钱粮及徇庇失察，俱照知府之例处分”入奏。部议应如所请，奉旨依议，遂升光州为直隶州，统属四县，屹然为东南重镇矣。

光山在春秋时为弦子国，《路史》云：在弋阳、扶县东南，今光山仙居东十里弦亭是也。鲁

僖公五年，楚斗谷於菟灭弦，弦子奔黄。于时江、黄、道、柏方睦于齐，皆姻也。弦子恃之而不事楚，故亡。战国属楚。秦并天下，属九江郡。西汉置西阳、軹县，属江夏郡。东汉，江夏郡置軹侯国。魏、晋属弋阳郡。刘宋改建光城左郡，大明八年省郡为县，置光城令，属弋阳郡。梁置光州，治光城县。元魏改光城县属广陵郡。隋初改为光山县，大业中又置光阳郡。唐太极元年，徙光州治定城县，改光山县属焉。宋因之。建炎后仙居省入。绍兴中改为期思县，寻复旧。嘉熙元年，兵乱地荒，寄治天台山。元至元十二年复立旧治，泰定间改属汝宁。明洪武四年，改属临濠。十三年，复改归光州，隶汝宁府。

固始，周蒋国。《左传》所谓：凡、蒋、邢、茅，周公之胤是也。《路史》云：先伯后侯爵，楚灭之，改为期思，封其大夫复遂为期思公，又分其地封孙叔敖之子，是为寝丘。又为古蓼国，杜预云：安丰，蓼县。安丰城在霍丘南十三里。《盟会图》云：在光州。《一统志》云：固始东北蓼城岗，即古蓼国。按固始东至霍丘县界六十里，古蓼国当在固始、霍丘两县境内。春秋鲁文公五年亦灭于楚。秦属九江郡。汉平九江王英市，封贲赫为期思侯，始置寝〔丘〕^⑬、期思二县，属汝南郡。光武改寝为固始，属淮阳国。曹魏属淮南郡。晋属汝〔阳〕〔阴〕^⑭郡，分期思隶弋阳郡。刘宋侨置新蔡郡，领固始一县。梁改蓼县。陈于期思置边城郡。元魏为固始县。北齐改置北建州，寻废州，置新蔡郡。宇文周改置淝州。隋初，州郡并废入，又改县为固始，改期思为殷城，属弋阳郡。唐以殷城、固始属光州弋阳郡，隶淮南道。五代时为吴王杨行密所据。宋至道三年，废殷城入固始，隶光山〔郡〕〔军〕^⑮。宋末兵乱，徙治无常。元至元中，复旧治。明洪武四年，隶临濠。十三年，改归光州，隶汝宁府。

息县，属《禹贡》豫州之域。息县，旧隶汝南。汝南即今汝宁。《地理今释》云：豫州，今河南之河南，开封、归德、南阳、汝宁五府，汝州；直隶之大名府东明、长垣二县；山东之兖州府定陶、城武、曹、单四县；江南之凤阳府颍、亳二州，颍上、太和、蒙城三县；湖广之襄阳府襄阳、光化、宜城、枣阳、谷城五县，均州；鄖阳府鄖、保康二县及颍西县东境、德安府隋州北境也。周息侯国，《路史》云：“妫姓。”春秋鲁庄公十四年，楚文灭之，遂县申息，以彭忠爽为令尹，又为江国，《汉书》：应邵云，安阳，古江国，《括地志》云：安阳故城在豫州新息县东南八十里。一云在息县西南十里。《水经注》载：淮水东经安阳县故城南，又东得溇口水，又东经新息县南。按：淮得溇口水后，又东得谷水。溇水，在青山东，罗山西，东北流注于谷。谷水东北入淮，然后东经新息。明是安阳故城，不在今息县境。《路史》云：在信阳县之东南，新息县之西南，是古江国地，半在信阳、罗山、半在宋息县也。鲁文公四年，楚穆灭之。战国时属楚。秦属颍川郡。汉于息国之东置县曰新息，属汝南郡。东汉又析置阳安及褒信侯国。《后汉书》云：国有赖亭。古赖国也。魏属豫州，晋因之，为汝南郡治。刘宋分为南、北新息。元魏因之，置东豫州。梁改为西豫州，又改为淮州。宇文周于〔北〕〔此〕^⑯置息州。隋废州，属汝南郡。唐武德四年，复置州，领淮川、长陵二县。贞观元年，废州为新息县，属蔡州，省淮川入真阳，即慎阳，今正阳是也。长陵入褒信。宋仍为新息，分建褒信。绍兴十一年与金议和，以淮为界，县遂属金。金置息州为重镇，领县四：曰新息、新蔡、真阳、褒信。元因之，中统三年，以李璫叛废州，四年复置。至元三年以四县并入州。复领真阳、新蔡二县。明洪武四年，降县属颍州，〔十三年〕〔七〕^⑰年，改属光州隶汝宁府。

商城，古郢国。《史记》苏秦说梁曰：“南有新郢。”则大梁之南境也。战国时属楚。汉兴，为期思、新郢二县，属汝南郡。东汉章帝〔建初〕^⑱四年，封孔子十四代孙伋于新郢，为绍嘉侯国，以承殷后。晋为，宋，侯相，属汝阴郡。刘宋因之。北齐以南迫陈境，置定城

兼。梁置义城郡及建州。元魏复置宋安郡，宋安县属广陵郡，又侨置新蔡县为新蔡郡治。隋并州郡，取期思县东古殷城置殷城县，属弋阳郡。唐武德元年改置义州^①，贞观元年废为栅。宋建隆元年避宣祖讳，改殷城为商城，置县，属光州光山(郡)〔军〕^②。至道三年复省入光山。嘉熙元年兵乱，徙光州治于商城之金刚台。元亦为商城镇，置达鲁花赤于金刚台。明洪武四年随固始隶临濠，十三年随固始隶汝宁，成化十一年复置商城县。

考州县之建，星罗棋布，大小相维，期如心之使臂，臂之使指。向四邑随州隶于汝宁，遥遥数百里，为之守者，每苦于绁短汲长。今去州不过百里内外，以一州控制其间，不惟仓库钱粮易于督盘，而各邑之利弊与民间之疾苦，亦可以周知而习察计。则当今之制，固为叶符地纪，协和舆情，垂鸿业于无穷，为万世之永赖者矣。

校勘记

①核《后汉书》十三部，实有郡国一百零五；《郡国志五》也称“百五”。据改。

②《晋书》卷14《地理上》作“郡国一百七十三”。据改。

③据《宋书》卷36《州郡二》原文改。

④查《宋书》无“新息太守”，而刘宋时东、西苞信均属“新蔡太守”。据改。

⑤《宋书》卷36《州郡二》作“姑孰”。

⑥《旧唐书》卷40《地理三》载：“武德三月以定城县为弦州。”《新唐书》卷41《地理五》亦载：定城“武德三年置弦州”。据改。

⑦《宋史》卷85《地理一》记“元丰又析为二十三”。据改。

⑧查《宋史》卷88《地理四》，光州弋阳郡隶属于淮南西路。据改。

⑨《续资治通鉴》卷134载：三十一年五月丙申，侍御汪澈为御史中丞。《宋史》卷384有“汪澈传”。据改。

⑩《元史》卷59《地理二》：“又新入版图，置省南京以控制之。”据改。

⑪据《中国古今地名大辞典》、《辞海》和《辞源》等书及正史，凡用作地名的

均用“颍”。如颍川，而不屑颍。据改。以下径改。

⑫《明史·职官四》作“直隶州视府”，据改。

⑬《汉书》卷28《地理志上》载：汝南郡领县三十七，有期思、寝县等；《辞源》“寝丘”条下：汉置寝县，属汝南郡。据改。

⑭《晋书》卷14《地理上》载：固始隶属于汝阴郡。据改。

⑮《宋史》卷88《地理四》：光州，弋阳郡，光山军节度；《元史》卷59《地理二》：宋升光州为光山军。据改。

⑯“于北”讲不通，当为“于此”。《隋书·地理中》云：“梁改曰西豫州，又改曰淮州。东魏复曰东豫州，后周改曰息州。”据改。

⑰《明史》卷42《地理三》载：四年，属颍州。七年仍隶属。据改。

⑱据《后汉书·郡国二》“汝南郡”条下补。

⑲唐置义州，《新唐书》为武德元年，《旧唐书》与《元和郡县图志》为武德三年。

⑳宋代没有郡的建置，《宋史》卷88《地理四》记有“光州，光山军”。据改。

光州志卷三

星野志

周天之数，三百六十五度四分度之一，分为十二次，为日月之所缠；地有十二分，为王侯之所国。盖地以山岳宣其气，气以精华钟为星，星之体生于地，而其精上著于天，列居错峙，各有攸属。故昔岁星在越，国不可伐；宋景自谴，荧惑移舍。班史谓天人之应，犹景之象形，响之随声。良不诬也。昔黄帝命萸^①占星^①，斗苞授规，正日月星辰之象，分星秩象，应著名，始终相验，于是乎有星官之书。厥后高阳氏有重黎，尧有羲和，夏、商有昆吾、巫咸。周保章氏以星土辨九州之地所封，封域皆有分星，以观妖祥。商史佚、内史叔、卜偃、士弱、梓慎、裨灶之徒，占候星物，纤微必验，载在史册，彰彰可考。自《甘石》以降，费直《易（说）（林）》^②，蔡邕《月令章句》，皇甫谧《帝王世纪》，或谱以易卦，或轮以节气，或推以月律。而魏太史《令》陈卓更定郡国所入之度^③，就所占验，亦往往有应。然其说纷然异，难以适从。

如今光之一郡，袤延不过六百余里，以西洋历二百五十里为一度之，说较之，《明史·天文志》云：中国当赤道北，北极常隐，南极常隐。南行二百五十里，则北极低一度，北行二百五十里，则北极高一度。淮南亦然。尚不足当一星之舍，而诸子有谓属房分，有谓属斗分，有谓属箕分。一隅之地，至分经六宿七十余度，其倘恍无凭，亦可知矣。《畿辅志》谓：司马太史公世掌天官，其先为周宣惠史，所次星野，必《周官》保章氏之旧。而自变封建为郡县，地理之书，莫先于班氏。然西洋之法，以中气过宫，《明史·天文志》注云：“如日躔冬至，即为星纪宫之类。”而恒星遂有岁进之差，宫无定宿，而宿可以递居各宫。故尧时仲春初昏，中星为鹑鸟，今之初昏，中星则在东井；尧时夏至，中星初昏为大火，今夏至初昏，中星则亢宿中之大角偏东数分余。自尧至今四千余年，而相差若此，则《史记·天官书》所分十二州星次，与班史《地理志》所载各疆国分野，其不可执以为则，已昭昭矣。

唐李淳风素专天文，其撰《法象志》，因《汉书》十二次度数，以唐州县配之。宋容斋洪氏常讥其谬乱，以为蔽于天而不知地。而僧一行以为，天下山河之象存乎两戒。北戒自三危、积石，负终南地络之阴，东及太华，逾河，并雷首、底柱、王屋，北抵常山之右，东循塞垣，至朝鲜，是谓北纪。南戒，自岷山、蟠冢，负地络之阳，东及太华，连商山、熊耳，外方、桐柏，南逾江、汉，携武当、荆山，至于衡阳，东循岭徼，达东瓯、闽中，是谓南纪。河源自北纪之首，循雍州北徼，达华阴，而与地络相会，并行至太行之曲，东流〔与〕④泾、渭、济，渚相为表里，谓之“北河”。江源自南纪之首，循梁州南徼，达华阴，而与地络相会，并行及荆山之阳，东流与汉、淮相为表里，谓之“南河”。故于天象，则弘农分陕为两河之会。自陕而西为秦、凉，北纪山河之曲为晋、代，南纪山河之曲为巴、蜀。自陕而东，三川、中岳为成周，西距外方、大伾，北至于济，南至于淮，东达巨野，为宋、郑、陈、蔡，河内及济水之阳为邶、卫；汉东滨淮水之阴为申、随，北纪之东，至北河之北，为邢、赵，南纪之东，至南河之南，为荆、楚。自北河下流，南距岱山为三齐，夹右碣石为北燕。自南河下流，北距

岱山为邹、鲁，南涉江、淮为吴、越。观两河之象，与云汉之所始终，而分野可知矣。

五月一阴生，而云汉潜萌于天稷之下，进及井、钺，得坤维之气，阴始达于地上，而云汉上升，始交列宿。东井据百川上流，故鹑首为秦、蜀墟，得两戒山河之首。云汉达地维右而渐升列宿上，觜觿、参、伐皆直天关表而在河阴，故实沈下流得大梁，距河稍远，涉阴亦深。故其分野，自漳负恒，居北纪众山之东南，外接髦头地。十月阴气进逾乾维，上达于天，云汉、室、壁间与内规相接。故自南正达于西正，得云汉升气，为山河上流；自北正达于东正，得云汉降气，为山河下流。阞訾在云汉升降中，居水行正位，故其分野当中州河、济间。内接成周、河内，皆豕韦分。星纪得云汉下流，析木为云汉末派。故其分野，自南河下流，穷南纪之曲，东北负海，为星纪；自北河末派，穷北纪之曲，东北负海，为析木。阞訾内接紫宫，在王畿河、济间。降娄、元枵与山河首尾相远，故为中州负海之国也。其地当南河之北、北河之南，界以岱宗，至于东海。自鹑首逾河，戒东曰鹑火，得重离正位。其分野，自河、华之交，东接祝融之墟，北负河，南及汉。自析木纪天汉而南，曰大火，得明堂升气。其分野，自巨野岱宗，西至陈留，北负河、济，南及淮。阳气自明堂渐升，远于龙角，曰寿星。龙角谓之天关，阳逾天关，得纯乾之位，故鹑尾直设巳之月。其分野，自南河以至负海，亦纯阳地也。寿星在天关内，故其分野，在商、亳西南，淮水之阴，北连太室之东，自阳城际之，亦巽维地也。

近代诸儒言星土者，或以州，或以国，虞、夏、秦、汉，郡国废置不同。周之兴也，王畿千里。及其衰也，仅得河南七县。七国之初，天下地形雌韩而雄魏，魏地西距高陵，尽河东、河内、漳、邺，东分梁、宋，至于汝南，韩据全郑之地，南尽颍川、南阳，西达虢略，距函谷、宜阳，北连上地。其后魏徙太梁，则西河合于东井；秦拔宜阳，而上党入于舆鬼。或者犹据《汉书·地理志》推之，是守甘、石遗术，而不知变通之数也。又以为古之辰次与节气相系，各据当时历数，与岁差迁徙不同。今更以七宿之中分四象中位，自上元之首，以度数纪之，而著其分野。

须女、虚、危，元枵也。初，〔须〕⑤女五度。中，虚九度。终，危十二度。其分野，自济北东逾济水，涉平阴，至于山茱，循岱岳之阴，东南及高密，又东尽莱莒之地，得汉北海、千乘、淄川、济南、齐郡及平原、渤海、九河故道之南。古齐、纪、祝、淳于、谭、寒及斟寻、有过、有鬲、蒲姑氏之国。

营室、东壁，阞訾也。初，危十三度。中，〔营〕⑥室十二度。终，奎一度。自王屋、太行而东，得汉河内，至北纪之东隅，北负漳、邺，东及馆陶、卿城。又自河、济之交，涉荧、济而东，得东郡之地，古邾、庸、卫、凡、胙、邶、雍、共、微、观、南燕、昆吾、豕韦之国。

奎、娄，降娄也。初，奎二度。中，娄一度。终，胃三度。自蛇丘，肥成，南屈巨野，东达梁父，循岱岳之阳，以负东海。又滨泗水，经沛、留、彭城，东至于吕梁，东南抵淮，尽〔淮〕〔徐〕⑦夷之地，得汉东平、鲁国、琅琊、东海、泗水、城阳，古鲁、薛、邾、莒、小邾、徐、郯、鄆、禹、邳、郭、任、宿、须句、颍臾、牟、遂、铸夷、介、根牟及大庭氏之国。

胃、昂、毕，大梁也。初，胃四度。中，昂六度。终，毕九度。自魏郡之北，得汉赵国、广平、巨鹿、常山，东及清河、信都，北据中山，全赵之分，又北尽代郡、雁门、云中、定

襄之地。

觜觿，参、伐，实沈也。初，毕十度。中，参七度。终，井十一度。自汉之河东，得上党、太原，尽西河之地，古晋、魏、虞、唐、耿、扬、霍、冀、黎、郇与西河之国。

东井、舆鬼，鹑首也。初，井十二度。中，井二十七度。终，柳六度。自汉三辅，得北地、上郡、安定，西自陇抵至河右，西南尽巴、蜀、汉中之地，及犍为、越巂、益州，极南河之表，东至牂牁，古秦、梁、幽、芮、丰、毕、骀〔扛〕〔杠〕⑧、有扈、密须、庸、蜀、羌、鬻之国。

柳、七星、张，鹑火也。初，柳七度。中，星七度。终，张十四度。北自荣泽、荥阳，并京、索，暨山南，得新郑、密县，至外方东隅，斜至方城，抵桐柏，北自苑、叶，南暨汉东，尽汉南阳之地。又自洛邑负北河之南，西及函谷，逾南纪，达武当，尽弘农郡，以淮源、桐柏、东阳为限，中得古周、虢、郑、管、邠、东虢、密、滑、焦、唐、随、申、邓及祝融氏之都。新郑为轸轩、祝融之墟，其东鄙则入寿星。七星系轸轩，得土行正位，河南分。张，直南阳、汉东，与鹑尾同占。

翼、轸，鹑尾也。自房陵、白帝而东，尽汉之南郡、江夏，东达庐江南部，滨彭蠡之西，得长沙、武陵，又逾南纪，尽郁林、合浦之地，自沅、湘上流，西达黔安之左，皆全楚分。自富、昭、象、龚、綉、容、白、廉州以西，亦鹑尾之墟。古荆、楚、郢、若、罗、权、巴、夔与南方蛮貊之国。翼当南河之北，轸当南河之南，其中一星主长沙，逾岭徼而南，为东瓯、青丘之分。

角、亢，寿星也。初，轸十度。中，角八度。终，氐一度。自原武、管城，东得封丘、陈留，尽陈、蔡、汝南之地，逾淮源至于弋阳，西涉南阳至于桐柏，又东北抵嵩之东〔阳〕⑨，中国地络在南北河之间，首自西倾，极于陪尾，故随、申、光皆豫州之分，宜属鹑火，为古陈、蔡、许、息、江、黄、道、柏、沈、赖、蓼、须顿、胡、防、弦、厉之国。氐涉寿星，当洛邑众山之东，与亳土相接，次南直颍水之间，曰亢分。又南涉淮，气连鹑尾，在成周之东，为角分。

氏、房、心，大火也。初，氐二度。中，房二度。终，尾六度。自雍丘、襄邑、小黄而东，循济阴，界于齐、鲁，达于吕梁，东南接太昊之墟，尽汉济阴、山阳、丰、沛之地，古宋、曹、成、滕、茅、郕、萧、葛、向城、偃阳、申父之国。

尾、箕，析木也。初，尾七度。中，箕五度。终，斗八度。自渤海、九河之北，得汉河间、涿郡、广阳及上谷、渔阳、右北平、辽西、辽东、乐浪、〔元〕〔玄〕⑩菟，古北燕、孤竹、无终之国。箕与斗相近，为辽水之阳，尽朝鲜三韩之地，〔及〕〔在〕⑪吴、越东。

南斗、牵牛，星纪也。初，南斗九度。中，斗二十四度。终，女四度。自庐江、九江，负淮水，南尽临淮、广陵，至于东海，又逾南河，得汉丹阳、会稽、豫章、彭蠡，讫苍梧、南海，逾岭表，自韶、广以西，珠崖以东，为星纪分。古吴、越、群舒、庐、桐、六、蓼及东南百越之国。南斗当淮、海间，为吴分。牵牛去南河浸远，自豫章迄会稽，南逾岭徼，为越分。

按一行之学，邃于星历。宋欧阳修撰《唐书·天文志》，备载其说。郑樵谓其辨十二次，唯以云汉始终言之，参以古汉郡国，其于区处分野，如指诸掌。是唐宋以来，当以息、江、黄、赖、弦、蓼诸国，皆豫州鹑火分之说为的矣。明太祖命刘基等纂《清类天文分野书》谓：汝宁府光州与怀庆府之温、孟、济源三县，寿州之霍丘与角、亢、氐分。刘基又考